

et questo habbiamo per molte vie, et che Grisoni li danno il passo.

337¹) Fu posto, per li Savi del Consejo, Terra ferma et Ordeni, che domenega a 8 zorni, che sarà a di... (27) de l' instante, sia dato il stendardo a sier Hironimo da chà da Pexaro eletto capitano zeneral di mar, et in questo mezo sia armato et provisto di quello li bisogna aziò vadi via. Fu presa. Ave: (163, 9, 0).

È da saper. Il maistro dipentor chiamato maistro Alvisè, stava a San Basso su la piazza de San Marco, et feva le bandiere et quelle di trombetti del ditto capitano zeneral, li è venuta la peste; è in caxa con un medico fiorentin che 'l vol varir; *tamen* va per bona via et cussi varite. Hor le bandiere fo tolte su una lanza et portate in una caxa a la Zueca, vuoda, dove starà a l' aiere; et li proveditori sopra la sanità li ha dà licentia di questo.

Fu posto, per i Savii, che al signor Theodoro Triulzi, venuto qui per nome del re Christianissimo a dimandar si restituissa Ravenna et Zervia al pontefice zà molti zorni, et insta la risposta, per il Serenissimo li sia risposto che non li havemo risposto fin hora, aspetando la resolution de la paxe general vol tratar la Christianissima Maestà mediante madama Margarita, et havemo mandato el mandato a l' orator nostro, qual conclusa, faremo cosa piacerà a Sua Maestà et a la Santità del pontifice; però non se li pol dir altro per adesso, con altre parole, *ut in litteris*. Ave: 60 di no, fu presa, et il resto di si; et chi contradiseva era persa.

Fu posto, per li Savi, una lettera a sier Gasparo Contarini orator nostro in corte, zerca questa venuta de l' imperator in Italia; et che per altre sue lettere Soa Santità disse si voleva interponer a far la paxe general, et cussi li mandassemo mandato. Al presente exortemo Soa Beatitudine a volerla concluder.

Item, un' altra lettera a parte, se li scrive prima per soa istrution, che, se 'l papa dirà nulla de haver messo un subsidio al clero, è stà per imprestado, per mantener le sue intrade, si che justifici la Signoria nostrà zerca questo. *Item*,

337* Fu posto una lettera in Franza a sier Sebastian Justinian el cavalier orator nostro, zerca questa venuta di Cesare in Italia, et il partir del Doria per Barzellona con l' armata. Per tanto Soa Maestà voi far magnanimamente et venir in Italia.

Fu posto, per li ditti, una lettera a sier Lodo-

vico Falier orator nostro in Anglia, scrivendoli: Come havemo inteso quel reverendissimo cardinale esser per andar a Cambrai, dove prima il serenissimo re ha mandato il duca di Sopholch so cugnato per tratar la paxe general con l' imperator, opera da excellentissimo re, pertanto pregarete Soa Maestà et reverendissima signoria che, andando, vogli far quell' officio che segua la ditta pace.

Copia di la parte posta per tutti i Savii che'l capitano zeneral di mar li sia dà il stendardo.

Havendosi per diversi avisi, che tutti confirmano el medesimo, la partita de Genoa del Doria *cum* galee et nave per Barzellona, secondo li mandati di Cesare, per la passata di Sua Maestà in Italia, quale se pò di giorno in giorno expetar, si deve, fra le altre provision per la sopraditta causa, non differir più la expedition del capitano zeneral nostro da mar, aziò che di l' armata nostra con tanto mior ordine et reputatione si possa receiver quel bon servitio et frutto che si desidera. Et hessendo perciò bisogno che'l possa haver con sè bona summa di danari per supplir a li bisogni et tener ben ad ordine una così numerosa armata;

L' anderà parte che, *cum* el nome del Spirito Santo et del protector nostro missier San Marco, l' ultima domenica del presente mexe, che sarà a di 27, sia per el Serenissimo Principe, *cum* le solennità et ordeni consueti, dato il stendardo al prefato capitano nostro, quale debba *immediate* da poi partir. Et li sia provisto de ducati 15 milia, qual el debbi portar con sè per li bisogni di l' armata nostra. Ave: 163, 9, 0. 338

El nota. È notà sul libro et menutà in cancellaria sier Hironimo da Pexaro savio del Consejo *etiam* lui in la parte, qual, per esser lui il capitano zeneral electo, non poteva nè doveva impazarsi in la ditta parte.

Di sier Jacomo Boldù capitano del lago di Garda, di 16, di Lacise, vidi lettere, qual scrive cussi: Per non esser risolto la dieta secreta si fa a Spira, qual si fornirà questo San Zuanne, non è altro di novo; ma venendo l' imperator in Italia, certo caleranno le zente ordinate si per le Terre Franche quanto per el contà de Tirol, salvo se non havesseno da far con turchi, come *etiam* se divulga in la Alemagna, che le zente di Ferandino

(1) La carta 336* è bianca